

Ferdinando Molteni (a cura di), *Vita della serva di Dio Maria Berlengiera distinta in quattro libri e ogni libro con li suoi capitoli*, Daner Edizioni, Savona 1998, pagg. 128

Questo libro o gh'a misso in pö de anni a-arivà inta nòstra biblioteca. A l'é a publicaçion de 'n manoscrito do 1727 in scià vitta de 'na pövia dònna de Spötorno mòrta in ödò de santità: a se chiamava Maria, a l'ea nasciua do 1536 e za da figeua a s'ea votà a-o Segnò, refuandose de pigià maio comme avieiva vosciuo a sò famiggia.

A letua da sò vitta (a l'é visciua 72 anni, nonostante penitense, fadighe e zazuin) a l'é interessante anche perché a ne ripòrta inderè a quelli tenpi inte quella parte da Rivea.




Pasquale Aurelio Pastorino, *Vocabolario del dialetto di Masone – In appendice i soprannomi dei Masonesi*, Fratelli Frilli Editori, Genova 2013, pagg. 352

L'otò o pensa che i dialetti seggian destinæ a sparì tutti quanti (sciben che o mòddo pe no pèrdili o ghe saiéiva: parlali!) e aloa o l'ha pensòu ben de sarvâ armeno a memöia de quello do sò paize, Mazon, cosci comme o Zane Ponte e o Mascimo Calisan (Calissano) an za fæto pe-o dialetto de Canpo (Campo Ligure).

In principio gh'é spiègòu e regole grafiche adèuviæ e asci 'n pö de gramatica, pöi vegne o vocabolaio da-o mazonin a l'italian e quello, esensiale, da l'italian a-o mazonin, fæto co-o conpioter da-o Peo Pastorin.

A-a fin gh'é trezze pagine de nomiagi di mazonin de tutti i tenpi, arecugeiti da-o Giacomo Otonello (Otonello), e asci de belle fotografie do pàize a-i primmi do '900.



Massimo Angelini, *Le patate tradizionali della Montagna genovese – La strategia di qualificazione di un prodotto locale tra storia, cultura rurale e recupero varietale*, Quaderni del Co.Re.Pa., Genova 1999, pagg. 128

De questo libro n'é stæto stanpòu solo 1000 còpie: pecòu, perché o l'é ben ben interessante!

O l'incomensa co-a stöia de l'arivo de patate chi da noiatri a-a fin do Seteçento (pioniere o pàreco de Rocatagià, in Fontanabonn-a, Michê Dondê – Michele Dondero) e de comme s'é arivæ a coltivalè dapertutto. Pöi o ripòrta tutti i nommi locali de varietæ "nostræ", con fotografie, descriçioin e tenniche de coltivaçion, e o parla do Co.Re.Pa. (*Comitato per il Recupero e la Valorizzazione del Patrimonio Varietale di Patata della Montagna Genovese*). In fondo gh'é asci de riçette da fin do '700: co-e patate ghe favan de tutto, finn-a o caffè!



Stefano Gallino, Alessandro Benedetti, Luca Onorato, *Wave Watching – Lo spettacolo delle mareggiate in Liguria*, Ulrico Hoepli Editore, Milano 2012, pagg. 224

O se presenta comme 'n libro fotografico, ma o l'é ben ben de ciù: e tantissime fotografie en eceçionali, in spettacolo comme dixè o sototitolo, e vâ a penn-a de sfeugialo solo pe quello, ma o l'é asci in libro scientifico.

Gh'é spiègòu bello ciæo comme se forma l'onda, comme se presenta e mareggiate inte varie zone da Liguria, quæ son i mègio pòsti donde amiale in seguessa.

Pöi gh'e l'elenco de mareggiate stòriche, quelle ch'an fæto tanti danni inti urtimi çent'anni, e pe-e ciù teribili (1955, 1976, 1989, 2000, 2008 e 2010) gh'é a descriçion preciza de come l'é anæto i fæti, con carte tenniche de condiçioin do tempo e ben ben de fotografie.

A-a fin gh'é asci spiègòu comme fotografâ e onde e quelli che-e cavarcan.

